



9. Tschanteda da la suprastanza cumünela in marculli, ils 6.7.2016 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Paolo Bernasconi, Jnes Barblan, Liun Quadri

Absaints:

Actuar: Duri Schwenninger

Tractandas:

- | | | |
|----|-------|---|
| 1. | | Protocol |
| 2. | 2.170 | Surdeda da lavuors da mantegnimaint e sgürezza piazza da scoula |
| 3. | 7.900 | Concept imsüra da cumpensaziun deponia Bos-chetta Plauna |
| 4. | 0.211 | Dumandas da fabrica |
| 5. | 0.211 | Decisiun demonter pütts da lain da la Swisscom in Val Susauna |
| 6. | 8.000 | Decisiun prossems pass regard chamanna da pesters Vaüglia Suot |
| 7. | 8.000 | Ledscha da champagna, pasculs ed alps, segunda lectüra |
| 8. | 9.999 | Varia |

La glista da tractandas vain approveda cun agiundscher la tractanda per ün credit per la planisaziun da la chesa da chüra Promulins.

Protocol: Il protocol da la tschanteda dals 09.06.2016 vain approvo unanimamaing.

80 2.170 Chesa e piazza da scoula Surdeda da lavuors da mantegnimaint e sgürezza piazza da scoula

La suprastanza piglia cugnuschentscha da 3 offertas chi sun entredas per fer lavuors da mantegnimaint e da sgürezza sün la piazza da scoula. Zieva cuorta discussiun decida la suprastanza cun 4 cunter 1 vusch da surder la lavur a la firma Ferrari Umbau und Renovationen AG da Zuoz pel predschi offert ill'otezza da fr. 11'398.05 inclus l'imposta sülla püvalur. Tar la surdeda s'ho resguardo l'offerta economicamaing la pü favuraivla.

81 7.900 Planisaziun dal territori cumünel Concept imsüra da cumpensaziun deponia Bos-chetta Plauna

Per quista tractanda es preschaint il planiseder Heinz Masüger da la firma Toscano SA. Cur chi sun gnies do ils permiss per ingrandir la deponia scu eir per eriger la nouva resgia e'l magazin forestel, es gnieu pretais dals uffizis chantunels imsüras da

cumpensaziun pel terrain chi'd es gnieu trat a nüz. Daspö löng es previs, cha la cheva da gerra in Flin vain fabricheda inavous e structureda uschè, cha'l purtret dal lö as megladra considerabelmaing e chi do lös da vita per amfibis e reptils. Impü ho la firma chi gestiunescha la deponia da pajer ün eventuel import da cumpensaziun sün ün conto blocco, e zieva püs ans as po alura vzair il resultat da la recultivaziun ed as po fer gio quint. Il planiseder preschainta il concept e do spiegaziuns detagliesas. Lotiers vain eir stipulo üna cunvegna traunter la vschinauncha, la deponia Bos-chetta Plauna SA e l'uffizi per natüra ed ambiaint, chi regla l'import da l'indemnisaziun scu eir la recultivaziun. Illa prosma tschanteda dess la suprastanza tratter il sböz da la cunvegna scu eir il concept preschanto.

**82 0.211 Dumanda da fabrica
Salzgeber Joos Simon, nouva lingia pel s-chudamaint a distanza
sün las parcelas nr. 12, 173, 174**

Joos Simon Salzgeber ho inoltro üna dumanda da fabrica BAB per eriger il colliamaint da la lingia pel s-chudamaint a distanza vers Zuoz sün las parcelas nr. 12, 173 e 174 da Somvih fin Champagnas. Zieva chi'd es avaunt maun il permiss da l'uffizi per il svilup dal territori, decida la suprastanza da conceder unanimamaing il permiss da fabrica cun las medemmas cundiziuns scu cha l'uffizi chantunel ho fat. Resguardand la decisiun da la radunanza cumünela dals 02.04.2014, vegnan ils contrats correspundents suottamiss pü tard, tenor las direcziuns definitivas da las lingias, a la radunanza cumünela.

**83 0.211 Dumanda da fabrica
Schlargiamaint dals indrizs per l'alluntanamaint da l'ova persa e
pel provedimaint da l'ova potabla Susauna**

La suprastanza piglia cugnuschentscha dal permiss da fabrica BAB da l'uffizi per il svilup dal territori dal chantun Grischun regard il schlargiamaint dals indrizs per l'alluntanamaint da l'ova persa e pel provedimaint da l'ova potabla in Susauna. La suprastanza decida unanimamaing da conceder il permiss da fabrica giavüscho.

**84 7.100 Proget schlargiamaint dals indrizs per l'alluntanamaint da l'ova
persa e pel provedimaint da l'ova potabla Susauna
Decisiun demonter pütts da lain da la Swisscom in Val Susauna**

Las lingias da telefon per la fracziun Susauna sun aunch'adüna al liber e chaschunan pels abitants a Susauna disturbis cun la tecnica d'hozindi. Cun elavurer il proget dal schlargiamaint da l'infrastructura s'ho contacto a la Swisscom e do la pussibilitad da metter las lingias da comunicaziun insembel cun las lingias cumünelas suot terra. La Swisscom pretenda, ch'els spordschan a Susauna il servezzan prescrit regard il Service Public e ch'els nu sun interessos da fer investiziuns per Susauna, siand cha Susauna nu tuocho tar els i'l territori abitabel. La suprastanza es da l'avis, scha las prunas pütts da lain svanissan, amegldress que in Susauna considerabelmaing l'aspet dal lö. Zieva animeda discussiun decida la suprastanza unanimamaing, da pretender d'alluntaner las pütts da lain fin il pü tard ils 31.12.2017 e da nüzzer la spüerta d'incabler las lingias da comunicaziun i'l foss da la vschinauncha.

**85 8.000 Agricoltura
Decisiun prossems pass regard chamanna da pesters Vaüglia
Suot**

L'uffizi per la planisaziun dal territori ho comunicho, cha la chamanna da pesters in Vaüglia Suot es gnida missa tres la cumischiun da priewel illa zona da priewel e ch'ün permiss da fabrica in quel lö nu po gnir miss in vista. L'uffizi chantunel pretenda infra 30 dis üna resposta regard ün eventuel spustamaint da la chamanna in ün oter lö. Zieva cuorta discussiun decida la suprastanza unanimamaing da comunicher, cha la chamanna dess gnir prefabricheda in ün oter lö, dadour la zona da priewel.

86 4.400 Fliamaint
Proget chesa da fliamaint Promulins, planisaziun, credit fr.
15'100.00

Per fer las lavuors preliminaras da planisaziun per üna chesa da fliamaint in Promulins a Samedan s'ho pudieu eruir ils cuosts per quella lavur. Scha la vschinauncha da Puntraschigna fo eir part al proget, que chi nun es auncha cler, muntan ils cuosts da planisaziun sün fr. 11'755.70, sainza Puntraschigna sün fr. 15'025.00. Zieva cuorta discussiun decida la suprastanza unanimamaing da deliberer il credit ill'otezza da fr. 15'100.00.

Sün proposta dal president decidan ils preschaints, our da motivs da temp, da cuntinuer a la prosma tschanteda cun la 2. lectüra da la ledscha da champagna, pasculs ed alps.

87 9.999 Varia

Il president orientescha, cha'ls 21 lügl 2016 ho lö il tradiziunel aperitiv per las vschinaunchas, offert dal militer in occasiun cha la scoula da recruta es preschainta a S-chanf dals 08 fin ils 29 lügl 2016. Per nossa vschinauncha piglia part il president cumünel.

Il depüto da scoula orientescha sur da la festina da l'ultim di da scoula chi'd es collio cun ir in charozza fin tar l'alp Pignaint e lo vain brasso.

A las 22.30vain la tschanteda alveda.

In buna fè

L'actuar:

D. Schwenninger